



Synfocity = 404

23rd August, 2012

mail us at : mzsynfo@gmail.com; mizoramsynod@gmail.com - Phone - 2314648

□ Social Front Consultation

August 20 khan Synod Conference Centre-ah Mizoram Synod Social Front bultumin Rangvamual leh Phunchawnga zu tam lutuk tihbo dan kawng ngaihtuaha inrawnkhawmna (Consultation) neih a ni. Inrawnkhawmna hun hi Rev. Lalzuithanga, Executive Secretary i/c Social Front-in a kaihrui a, Social Front Committee member Upa Lalsiama Fambawlin tawngtaiin hunserh a hmang a ni.

He hunah hian Rangvamual leh a chheh vel boruak Power Point hmanga thlir ho a ni a. Dr. Robert S. Halliday, Social Front Coordinator-in Concept Paper a buatsaih a chhiar a, sawi ho zui a ni. Sawi hona hun hman a nih zawhin Paper buatsaihtuin khaikhawmna hun a hmang leh a. Social Front Committee member Upa Zaneihluangan kal khawmte hnenah lawmthu a sawi a, Social Front Committee member Revd. Chuauthuaman malsawmna sawiin hun a khar. Consultation-ah hian Aizawl khawpui chung kohhran tin atangin Social Front Committee hruaitute kal tura sawm an ni a, mi 323 an kal a, an zinga mi 21-in hma lak dan tur rawtna an sawi a. Kalkhawmte hian hetiang hian rawtna an siam a, chungte chu -

Demand reduction lamah

1. Heng veng pahnihte dinhmun hi survey-a zir chian ni se
2. Servey result atangin kohhran tinin tum bik tur insemi hma lak ni se
3. He hmuna kal thin mahni kohhran theuha mite lakah tan lak ni se
4. Counselling/recreation centre hawn ni se
5. Kohhran tinin tawngtaiin tan la zui ila

Supply reduction lamah

1. State pawn lam mi heng hmuna awmte chungah hian dan anga hma la turin sorkar ngen ni se
2. Kohhran leh tlawngai Pawlte tanho dan kawng zawn ni se
3. Zu zuarte hnenah an mamawhna anga Pathian thu hrih dan tur duan fel ni se
4. Zu zuarten eizawmna kawng dang an neih theih nan kawng zawn ni se
5. Excise Post siam turin sawrkar ngen ni se.

tihte a ni.

□ MPF leh Political Party hrang hrang ten thawhhona thuthlung an pawm

Nimin (Aug. 22) khan Mizoram People Forum (MPF) leh Political Party hrang hrang aiawhte thukhawm chuan kum 2013-a Mizoram Legislative Assembly Inthlan lo awm tura thawhhona tur thuthlung an duan ho chu an pawm.

Mizoram People Forum (MPF) leh Mizorama Political Party hrang hrang aiawhte Synod Office Committee Room No. 1-ah thukhawmin kum 2013-a Mizoram Legislative Assembly inthlan lo awm tura thawhhona tur thuthlung July 31-a an duan ho, MPF Office lamin a lo chulmam chu an thlir ho leh a, siamthat ngai laite siamthain an pawm. Meeting hi MPF Chairman, Synod Moderator ni bawk Rev. Thangzauvan a kaihrui a, Political Party hrang hrang – Indian National Congress (INC), Mizo National Front (MNF), Zoram Nationalist Party (ZNP), Mizo Peoples Conference (MPC) aiawh 3 theuh leh Bharatya Janata Party (BJP) aiawh mi 2 an kal thei a, Mizo People Forum (MPF) awiawhte, an Chairman Rev. Thangzauva leh General Secretary Upa Lalramthanga hovin mi 10 an tel thei bawk.

Mizoram Legislative Assembly Inthlanna, kum 2013-a lo awm tura thawhhona thuthlung waviina an pawm hi Party tin President te leh MPF hotu ten hming an ziak hnan leh dawn a. Kar leh chung hian Party hrang hrangte remchan dan angin MPF hotute hian an Office theuhah an kal chilh ang a, hetah hian thawhhona tur thuthlung hi Party hotute leh MPF hotu ten hming ziak hnanin an nemnghet dawn a ni.

Political Party-te leh MPF Thawhhona Thuthlung pheh hnungah tarlan a ni.

□ PBS Graduation Service

Waviin (August 23) chawhnu dar 1:00 khan Presbyterian Bible School (PBS) chuan Pi Zaii Hall, Synod Conference Centre-ah Session 25-na Graduation Service an hmang.

Graduation Service programme hi Senior Executive Secretary Rev. Vanlalzuatan kaihruiin hunserh a hmang a, Rev. H. Biakthansangan Presbyterian Bible School-a thawktute, Board member leh zirlaite inhmehriattirna hun a hmang a, PBS Principal Rev. R. Lalengmawian report a pe bawk. Synod Moderator Rev. Thangzauvan thuchah sawiin zirlai pass chhuakte hnenah certificates a hlan a, PBS Board member Rev. Dr. R. Lalbiakmawian exam-a ti thate leh class kal kimte hnenah lawmman a hlan a ni. Ni. Zoramchhanin zaiin kalkhawmte a awi a, Upa D.P. Biakkhuma, Synod Secreatry-in zir chhuakte tawngtaisakna hun a hmang a, Board member Rev. Vanlalchhuangan fuihna thu a sawi a, zirlai aiawhin thusawi a awm bawk. Rev. R.K. Lalnunmawian lawmthu sawina hun a hman zawhah Rev. C. Lalsanglian malsawmna sawiin a tin a ni.

Presbyterian Bible School hi kum 2004 May thla atangin tan a ni a, a din tan tirh atangin zirlai 1023 zinga 844-in an zirchhuak tawh a. Session 25-naah hian zirlai 72 an awm a, chung zinga 63 chuan zir tuan chhuakin an pass a; First Division-ah 12, Second Division-ah 31, Third Division-ah 11, Simple Pass 9 an awm a, Exam lo 5 leh Failed 4 an awm bawk. Tun tumah hian a ti tha zual top 3 position-ah mi 4 an awm a, chungte chu:-

1. Samuel Lalremfima s/o H. Lalsiama, North Mualcheng Kohhran
2. Lalnunfeli d/o Lalhriata, Mamit Kohhran
3. R.D. Lalruatfela s/o R.D. Tinthanga, Seling Kohhran
3. Jerry Lalrintluanga s/o Zosangliana, Khatla North Kohhran

Presbyterian Bible School atanga zirchhuakte hi rawngbawlna tangkaiah an inhmang zui hlawm a, Missionary leh Social Worker-a tang zui tam tak an awm a, B.Th. leh BD zir zawn thahnem tak an awm tawh a, Synod Revival Speaker zinga tam takin heta tang hian Pathian thu an zir chhuak tawh bawk a ni.

□ Synod Mission Board

- ♦ August 17 - 28 chung hian Jharkhand, Patna, Lucknow, Delhi Mission Field Committee meeting neih mek a ni a, Field Committee neihpui tur hian Rev. Lalchuanmawia, SMB Secretary; Rev. Rualkhuma leh Rev. R.S. Rokima (BEC Members) te an kal. August 20 (Thawhtanni) khan Jharkhand Field Committee an thu a, August 22 (Nilaini)

Contd...

khan Patna Field Committee an thu leh bawk. August 24 (Zirtawpni) ah Lucknow Field Committee an thu leh ang a, August 27 (Thawhtanni) ah Delhi Field Committee an thu leh ang.

♦ Synod Mission Board chuan kumin (2012) chhung atan P.C. Parvulluui, Evangelist Teacher (Contract Missionary) an la thar a, SPS Madhuripathar, Arunachal West-ah a thawk ang.

□ **MSSU**

August 25 (Inrinni) hian Ramhlun Sports Complex Kohhranah Sunday School Zirtirtu Training neih a ni dawn a, training neihpui tur hian Pu John Lalhruaitluanga, MSSU Asst. Coordinator; Upa B. Lalhmunliana, Bethlehem Venglai leh Upa Hrilthansanga, Mission Vengthlang (MSSU Trainers) te an kal ang. Zan Inkhawmah Fanau enkawl (child evangelism) chungchang thuchah Upa Hrilthansangan a sawi bawk ang.

□ **Synod Literature & Publication Board**

August 24 - 26 chhung hian Ruanthlang Pastor Bial huapin Zotlang Kohhran Hall-ah Literature Seminar neih a ni dawn a, seminar neihpui tur hian Rev. K. Lalpiangthara, SL&PB Editor, Upa H. Ronghaka, SL&PB Jt. Editor leh PRESCOM atangin Pu Lalniliana, Synod Bookroom Manager, Tv. Lalzarmawia, Sales Promoter leh Ni. Zoremawii, Chawnpui (Soloist) te an kal ang.

Zirtawp (Aug. 24) zan leh Inrinni (Aug. 25) nilengin a mamawh tan Synod Bookroom lehkhabute lei theihin phochhuah a ni ang a, Inrinni (Aug. 25) zan atanga Pathianni (Aug. 26) zan thleng Bial hruaitute ruahmannain Bial chhung Kohhran hrang hrangah hun an hmang bawk ang.

□ **Music**

Nagaland Conservatory of Music College, Dimapur-ah B.MUS zir turin Pu H. Lalrinmawia, Synod School of Music-a Instructor chu vawiin (Aug. 23) hian a kal a, kum 4 chhung zir tur a ni ang.

□ **Kristian Thalai Pawl**

August 24 (Zirtawpni) zan hian Central KTP Leader Rev. Lalrinmawian Sateek Kohhran a tlawh dawn a, Mizoram Synod Choir-ten an tawiawm ang.

□ **Hruaina Eng FM Radio & TV Programme**

♦ **AUGUST 24 (FM Radio @ 7:30 p.m.) :**

Choir : Mizoram Synod Choir - Hriatchian leh zual che ka duh, Bawngkawn Bial Zaipawl - Puan var sin,

Thuchah : Rev. C. Lianhmingthanga - Pathian Lehkhabu tangkaina,

Solo : Vanlalsailova - Damchhan,

Group Zai : Crusaders - Keini zawng

♦ **AUGUST 26 (TV Programme @ 3:00 p.m. :**

Choir : Bethlehem Kohhran Zaipawl - Kan Pathian Kulhpui Nghet,

Solo : Lalruotmawi - Emau dai reh,

Sermon : Upa H. Zoliana (Revival Meet 2012),

Group : Electric Veng KTP - Emanuel,

Interview : Rev. Z. John Malsawma Colney, Wales rama CWM Missionary,

Solo : Lalruotmawi - Ka duh ber Lalpa,

Musical Drama : Hani - Thakthing Veng KTP

□ **Susamachar Prasaran Programme**

August 26 (Pathianni) 5:00 pm. Hindi Gospel Programme (Susamachar Prasaran) :

Group/Choir/Solo : Masihi Sangati Bungkawn Vengthar - Aatma Ra Deha,

Group/Choir/Solo : Venghnuai Kohhran - Milkar Hamm,

Sermon : Rev David Lalramliana Ralte - Hum Parmwshwar ke santaan,

Group/Choir/Solo : LH Hindi School - Yeshu MASIH,

Group/Choir/Solo : CTI Sesawng Kohhran Masihi Sangati

□ **Moderator Programme**

Synod Moderator, MKHC leh MPF Chairman ni bawk Rev. Thangzauva chuan August 24 -26 chhung hian Bangalore-a Mizo Kohhrante a tlawh ang. Tun hnaia Assam rama Bodo leh Muslim-te inkara buaina chhuak chungchangah Presbyterian Church of India (PCI) atanga ngenna lo kal angin Mizoram Synod OM (Officers Meeting) chuan Presbyterian Kohhrante hnenah tawngtaipui tura ngenna a lo siam tawh a. Hemi hnu hian, Bodo leh Muslim-te inkara buaina kal zelah India ram chhim lama awm North East mi leh sate tana boruak tha lo a lo awm thar tak avangin Synod Moderator hian Bangalore tlawh programme hi a siam leh ta a ni. Moderator hi Pu Sadinga Sailo, Synod Mission Board Mission Promoter-in a tawiawm ang a, Bangalore an tlawh zawhah Patna, Delhi leh Kolkata Mission Field te an tlawh kual ngal ang.

SYNOD REVIVAL RAWNGBAWLNA
(August - September, 2012)

Sl. No.	Speaker-te Hming	Rawngbawl na hmun	Rawngbawl dan	Rawngbawl hun chung
1	Tv. C. Zairemmawia	Kawnpui Hmar Veng	Camping	11 Aug. - 15 Sept., 2012
2	Upa R. Lalhmachhuana	Khuangleng	Camping	18 Aug. - 2 Sep., 2012
3	Pu Lalsanglura Ralte	Sairang	Camping	18 Aug. - 2 Sep., 2012
4	Pu C. Lalnunsanga	NE Khawdungsei	Camping	Aug. 25 - 16 Sept., 2012
5	Pu R. Zaihmingthanga	ZEF	Crusade	25 & 26 Aug., 2012
6	P.C. Vanlalngkhaki	Chhingchhip Venghlun	Crusade	Aug. 30 - 2 Sept., 2012
7	Pu C. Lalramthara	Upper Republic Sacrament	Camping	Aug. 30 - 2 Sept., 2012
8	R. Lalbiaksanga	Thingsulthliah	Ramthar Campaign	Aug. 31 - 2 Sept., 2012

POLITICAL PARTY-TE LEH MPF THAWHHONA THUTHLUNG

Mizoram chhunga Inthlanna hrang hrang heng - Mizoram Legislative Assembly General Election 2008, MP Election 2009, Village Council Election 2009 & 2012, Aizawl Local Council Election 2012, Aizawl Municipal Council Election 2010 leh Autonomous District Council Elections-ah te hlawhtling takin 'Thawhhona Thuthlung' siam a, Mizoram chhunga political party hrang hrang leh Mizoram People Forum-te hmalâkna chuan rah tha a chhuah zel a. Kan inthlanna pawh a tha thawkhatin, ram chung leh ram pawns lam thlengin mite hriat leh ngaihven a hlauh ta hle a. Hei hi kan zavaia tan tlanna leh thawhhona rah a ni.

Kum 2013-a Mizoram Legislative Assembly General Election lo awm turah pawh hian **inthlanna thianglim, dik leh felfai tak a awm ngei theihna tur leh sawrkâr tha, thlei bik nei lo, mipui huapzo** din a nih ngei theihna turin Mizoram People Forum General Headquarters hruaitute leh Political Party hrang hrang hotute chuan tan lâk ho dân tur kan ngaihtuah a. A hnuai inkaihhruaina tlangpui târ lante hi zawm theuh tha kan ti. Hei hian MLA General Election 2013 Inthlan hun puan atanga Inthlan zawh fel thleng a huam ang.

1. Inthlan chungchâng

- (1) Inthlan thianglim, dik leh felfai tak a awm ngei theihna turin mi tinin theihtâwp chhuah theuh ni se.
- (2) Inthlanah hian khua leh tui dik tak, vote neite chuan vote thlâk theuh ni se.
- (3) Vote thlâk tur khawpui atanga anmahni khaw lama an hawna tur ngaihtuahsak emaw, hmun dang atanga anmahni vote awmna lama an kalna tur ngaihtuah a, insengsova buaipui emaw hi tu mahin tih loh ni se.

2. Inthlan senso chungchâng

- (1) Inthlan hautak lutuk leh senso sâng lutuk titem turin theihtâwp chhuah theuh ni se. MPF-ten candidate-te leh party te hnenah pawisa dîl emaw, dawn emaw khap tlat a ni.
- (2) House to house campaign hi thil dik lo tam tak inphum ruk theihna leh senso titamtu a nih theih avângin tih loh hi a tha ber a; amaherawhchu, mipuiten candidate-te an hmuh duh thin avâng leh candidate-te pawhin an bial mipuite tlawh an duh thin avângin inthlan hma ni 10 thleng chuan house to house campaign programme siam theih a ni ang a; chumi hnu lamah erawh chuan tu mahin tih loh ni se.
- (3) Sum leh therhlo dang hmanga vote lei leh hralh hi tih loh ni se. Mipui, pâwl hrang hrang leh Kohhrante pawhin party leh candidate-te hnenah thil phut neih tur a ni lo. Chutih rualin thil chi hrang hrang sem, (enîr nan- silpouline, jersey, football, mobile handset, sawrkâr development kal lai leh NLUP leh thil dangte) hi tih loh ni bawk se.
- (4) Kawng zawh hi inthlan hma ni 10 hnu lamah chuan tih loh ni se, ruaitheh leh picnic hi tih loh ni bawk se. Ruaitheh tih hian mikhual chaw eipui te, block leh unit hruaituten tul bik thila chaw an ei khâwm thin angte hi a huam lo vang. Candidate-te rulh tura anmahni hriat lohva dâwr leh hmun dang atanga thil lo lâk leh pekte hi tih loh tur a ni.
- (5) Candidate-te tana inthlan tihautaku, heng - banner, flag leh poster-te hi veng tina târ zât tur hetiang hian bithliah a ni :-
 - ✚ *VC / LC member pasarih nei chinah* :
Banner - 3, Flag – 30 leh Poster - 20 thleng
 - ✚ *VC / LC member panga nei chinah* :
Banner - 3, Flag – 20 leh Poster - 15 thleng
 - ✚ *VC / LC member pathum nei chinah* :
Banner - 3, Flag – 10 leh Poster - 10 thleng
 - ✚ *Banner hi 18 x 4 aia lian lo ni se. Poster hi 2'x 11/2' aia lian lo ni se.*
 - ✚ *Party symbol chuang lukhum, badge leh sticker te hi campaign na hmanruaah hman loh ni se.*
 - ✚ *Flag, Banner leh Poster bituk aia tam tar an awm chuan MPF-in la thla turin hrih se.*

3. Zalen taka inthlan leh venhimna chungchâng

- (1) Invau leh inrîkrâp awm lo turin theihtâwp chhuah theuh ni se.
- (2) Helte hmanruaah hman leh râltuam chelekna awm thei te huai taka dodâl theuh ni se.
- (3) Border leh sensitive area-ah te a tul leh mamawh anga venhimna a awm theih nân hmalâk ni se.

4. Policy implementation

- (1) A tak ram thleng thei tur leh tihlawhtlin theih tur chauh - manifesto, policy leh programme duan ni se.
- (2) Mimal chungchâng leh tualchhung thil chauh ni lovin, party policy leh programme hi campaign-na leh inzawrhna atân hman ni se. Dâwt leh thu belhchian dâwl lo leh finfiah nghâl mai theih loh hmanga inbeih hi tuman tih loh ni se.

5. Candidate chungchâng

Political party tinin candidate an siam laiin hetiang mi hi candidate atân ruat tura beisei an ni :

- (1) Mi hmingtha, mize nghet leh rilru puitling.
- (2) Mi taima leh rinawm.
- (3) Dik lo leh kut tling lova sum leh thil dang hmuh tum lo mi.
- (4) Zu leh ruihtheih thil dang laka fihlim
- (5) Mipat hmeichhiatna kawnga sawisel kai lo.
- (6) Ram leh hnam Dân pawisa mi leh dikna ngaisâng mi.
- (7) Khawtlâng leh mahni mihring puite thatna tur duha, chumi atâna inhmang peih mi.
- (8) Mahni sakhua, kohhran leh pâwla mi hmingtha leh rinawm.

6. Thawhhona chungchâng

- (1) Constituency huam chung khaw lian deuh deuhvah MPF leh candidate-te remruatna angin, MPF Constituency Forum kaihhruaina hnuaiah Joint Platform buatsaih theih a ni ang a, chung tinten candidate an lo hmelhriat theih nân leh an thu leh hla an lo dawnawn theuh theih nân, a theih leh remchân dân angin, he programme hi Local TV leh Media-ahte pek chhuah ni se. Joint Platform hi pâwl dang leh mi dangin buatsaih loh ni se.
- (2) Party malin a hranpaa public meeting neih an duh a nih pawhin MPF kaihhruaina hnuaiah ni thei se. MPF awm lohnaah chuan party malin a remchân dân anga kalpui mai ni se.
- (3) Vantlâng tâna thingpui lum loh ni se; polling booth area bul hnaia electoral roll en leh number pek chhuah hi political party-ten a mala buaipui lovin, MPF kaihhruainain, fimkhur taka buaipui ni se.

7. Tlângkawmna

- (1) A chung a 'Thawhhona Thuthlung' târ lan piah lamah hian MPF District, Constituency leh Local Forum ten ruahmanna hran siam loh ni se.
- (2) Heng 'Thawhhona Thuthlung' hi bawhchhia an lo awma, finfiah ngei a nih chuan, MPF-in a theih leh remchân dân angin an bawhchhiatna constituency huam chungah a puangzâr ang.
- (3) He 'Thawhhona Thuthlung' hi MPF leh political party tinin a zau thei ang berin theh darh ni se.

PATHIAN THU ZIR DUH TAN

Presbyterian Bible School, Mission Veng-ah Session 26-na atan Certificate in Theology (C.Th) Admission hawn a ni a. Dil duhte tan a hnuaia tarlan hi hriat tur a ni e.

- 🕒 Admission Form : Office hun chhungin Rs. 10/- a lei theih a ni
- 🕒 Dil hun chung : September 3, 2012 (Thawhtanni) tlai dar 3:00 thleng
- 🕒 Dil thei chin : Class VII passed, kum 16 chin, Kohhran dan chhunga awm
- 🕒 Interview : September 5, 2012 (Nilaini) zing dar 10:00
- 🕒 Class tan hun : September 7, 2012 (Zirtawpni)
- 🕒 Zir hun chung : September - December, 2012
- 🕒 Stipend : Zirlai pakhat hnenah thla tin Rs. 500/- pek a ni ang. Hostel a awm lo.

Hrechiang duh tan Phone No. **857308007/2317343/2350082**-ah zawh theih a ni.

Sd/-
REV. R. LALENGMAWIA
Principal